

四庫全書

經部

欽定四庫全書

經部

五禮通考卷一百九十九

詳校官侍郎

臣

劉躍雲

給事中

臣

溫常綬覆勘

總校官進士

臣

繆

琪

校對官中書

臣

李

奎

謄錄監生

臣

徐

紹城

欽定四庫全書

五禮通考卷一百九十

刑部尚書秦蕙田撰

嘉禮六十三

觀象授時

夏書脩征惟時義和顛覆厥德沉亂於酒畔官離次倂

擾天紀遐棄厥司乃季秋月朔辰弗集於房

傳辰日月所會房所

合之次集合也

不瞽奏鼓嗇夫馳庶人走

傳凡日食天子代鼓于社

替樂官樂官進鼓則伐之耑夫主幣之官馳義和尸厥
取幣禮天神衆人走供教日食之百役也

官閭聞知昏迷于天象以干先王之誅政典曰先時者

殺無赦

傳政典夏后為政之典籍若周官六卿之治典
先時謂律象之法四時節氣望晦朔先天時

則罪死
無赦

不及時者殺無赦

傳不及謂推象後天時雖治
其官苟有先後之差則無赦

況廢官乎

疏昭七年左傳曰晉侯問于士文伯曰何

謂辰對曰日月之會是謂辰日月俱右行于天日行遲

月行疾日每行一度月日行十三度十九分度之七

計二十七日過半月已行天一周又逐及日而與日聚

會謂此聚會為辰一歲十二會故為十二辰即子丑寅

卯之屬是也房謂室之房也故為所舍之次日月當聚

會共舍今言日月不合于舍則是日食可知也日食者

月掩之也月體掩日日被月映即不成共處故以不集

言日食也或以為房謂房星九月日月會于大火之次房心共為大火言辰在房星事有似矣知不然者以集是止舍之處言其不集于舍故得以表日食若言不集于房星似太遲太疾惟可見算錯不得以表日食也且日之所在星宿不見止可推算以知之非能舉目見之君子懷疑寧當以日在之宿為文以此知其必非房星也先時不及者謂此推象之法四時節氣弦望晦朔不得先天時不得後天時四時時各九十日有餘分為八節節各四十五日有餘也節氣者周天三百六十五日四分日之一四時分之均分為十二月則月各得三十三日十六分日之心以初為節氣半為中氣故一歲有二十四氣也計十二月每月二十九日彊半也以月初為朔月盡為晦當月之中日月相望故以月半為望望去晦朔皆不滿十五日也又半此望去晦朔之數名之曰弦弦者言其月光正半如弓弦也晦者月盡無月言其闇也朔者蘇也言月死而更蘇也先天時者所名之日

在天時之先假令天之正時當以甲子為朔今律乃以癸亥為朔是造律先天時也若以乙丑為朔是造律後天時也律後即是不及時也其氣望等皆亦如此

大衍議書曰乃季秋月朔辰弗集于房劉炫曰房所舍之次也集會也會合也不合則日蝕可知或以房為房星知不然者日之所在正可推而知之君子慎疑寧當以日在之宿為文近代善術者推仲康時九月合朔已在房星北矣案古文集與輯義同日月嘉會而陰陽輯睦則陽不疚乎位以常其明陰亦含章

示冲以隱其形若變而相傷則不輯矣房者辰之所
次星者所次之名其揆一也又春秋傳辰在斗柄天
策燁燁降婁之初辰尾之末君子言之不以為謬何
獨慎疑于房星哉新術仲康五年癸巳歲九月庚戌
朔日蝕在房二度炫以五子之歌仲康當是其一肇
位四海復修大禹之典其五年義和失職則王命徂
征虞劓以為仲康元年非也

蕙田案掩食為不安輯因星象而置辭耳房

如皆火房也之房非房宿也仍當從舊說或
因小雅十月之詩有月食其常日食不臧之
文疑古人但推月食不推日食非也左傳梓
慎曰二至二分日有食之不為災日月之行
也分同道也至相遇也其他月則為災陽弗
克也古人精于天象其言有本蓋如此小雅
詩人去春秋時不甚遠豈相懸至此詩特為
憂時致儆之詞耳陳師凱云觀篇中有渠魁

協從之語義和聚黨助羿明矣仲康乘日食之變正其昏迷之罪羿亦不得而在之使非聚黨助逆則褫職奪邑司寇行戮足矣何至與師誓衆哉此論雖似得當時情事特日食亦非借辭也義和司天之官凡天變皆當測驗先時後時乃司天者之大戒況如交食又為顯明向使義和克舉厥職早為測定則君臣上下預先誠備何至臨時瞽與瞽夫庶人

忽奏忽馳忽走為此倉惶驚駭之狀哉觀瞽
與瞽夫三句可知伐鼓用幣之禮古已有之
而日食之必為推驗無疑矣況欽若授時經
上古數聖人精心創制迥非後人沿襲推算
者所可及寧有天象之變如日食之大者而
顧不及耶堯典命羲和乃統舉大綱語其常
而不及其變耳

觀承案羲和之事引證自無不可解經則自

以陳說為長蓋日食失占鰥官之罪難辭然
非常赦不原者何至興師動衆必欲滅此而
殺無赦哉且仲康原是乘其有罪而討之初
非借詞則知罪固有浮於此者特因是以誅
之可以泯然無迹則聖賢自有作用原非宋
襄仁義可比者耳

詩小雅十月之交朔日辛卯日有食之亦孔之醜

傳之
交日

月之交會醜惡也 箋周之十月夏之八月也 八
月朔日日月交會而日食陰侵陽臣侵君之象

彼月

而微此日而微

傳月臣道日君道
疏每月皆交會而月或在日道表或在

日道裏故不食其食要于交會又月與日同道乃食也
日者太陽之精至尊之物不宜有所侵侵之則為異計
古今之天度數一也日月之食本無常時故律象為日
月交會之術大率以百七十三日有奇為限而日月行
天各自有道雖至朔相逢而道有表裏若月先在裏依
限而食者多若月先在表雖依限而食者少日月之食
于算可推而知則是數自當然而云為異者人君者位
貴居尊恐其志移心易聖人假之靈神作為鑒戒耳夫
以昭昭大明照臨下土忽爾殲亡俾晝作夜其為怪異
莫斯之甚故有伐鼓用幣之儀貶膳去樂之數皆所以
重天變警人君者也而天道深遠有時而驗或亦人之
禍蒙偶與相逢故聖人得因其變常假為勸戒使智達
之士識先聖之深情中下之主信妖祥以自懼但神道
可以助教而不可以為教神之則惑衆去之則害宜故

其言若有若無其事若信
若不信期于大通而已矣

戴氏震詩補傳交者月道交于黃道也月以黃道爲

中其南至則在黃道南不滿六度

步算家謂之陽律

其北至

則在黃道北不滿六度

謂之陰律

其自北而南

古名爲正交今名爲

中自南而北

古名爲中交今名爲正交

斜穿黃道而過是爲交

乃有食以步算之法上推幽王六年乙丑建酉之月

辛卯朔辰時日食詩據周正十月非夏正

以爲夏十月周十二

月建亥者誤也

凡日食月掩日也月在日之下人又在月之

下三者相準則有日食故日食恒在朔日月正相對而地在中央三者相準則有月食故月食恒在望月食由于地影日食則主人目蓋月卑日高相去尚遠人自地視之其食分之淺深及虧復之時刻隨南北東西而移故視會與實會不同

步算家立三差求之高下差也東西差也

南北差也

前人之為術疎有當食不食不當食而食之說

占家之妄也然則日月之行有常度終古不變聖人以為天變而懼何也曰日月之主乎明者常也其有

所掩之者則為變也君道比于日故以日引喻尤切
宜常明而不宜有蔽者也聖人恐懼修省無時不然
所謂日食修德月食修刑又其敬天變而加警惕耳
古人鑒白圭之玷而慎言豈以圭之玷為災異乎此
詩借日食以警王欲王自知其掩蔽也知其為一時
所揜蔽而醜之則修德而復乎常明之體矣

日月告凶不用其行四國無政不用其良

箋行道度也
不用之者謂

相干
犯也

彼月而食則惟其常此日而食于何不臧

戴氏震詩補傳行道也日月以常明為道有時虧食
以告凶于上是不用其道也告凶所謂日月之災是
也君當用善以為政今四國無政是不用其良也日
之所繫大矣故其食非月食之比以喻君之所繫大
也詩中凡理道皆曰行如示我周行女
子有行之類先儒誤以為
行度遂有日失行之說誤矣

觀承案行即道也道即度也赤道黃道是日
月之道即是日月之度各行其道故日月並

明即交於其道亦不相掩食是之謂能用其
行也蓋行道之道即道理之道無二道也今
必謂日月行度本不失其常乃是失其常明
之道理試思下人見為交食而無光者天上
視之其常明之道理並無少損也其故全在
交道之行非如常行之度耳則謂失其常行
之度者亦何不可戴氏此解不免執已見以
改舊說矣

春秋隱公三年春王二月己巳日有食之 公羊傳何

以書記異也日食則曷為或日或不日或言朔或不言

朔曰某月某日朔日有食之者食正朔也其或日或不

日或失之前或失之後失之前者朔在前也注謂二日食失

之後者朔在後也注謂晦日食穀梁傳言日不言朔食晦

日也其日有食之何也吐者外壤食者內壤注凡所吐出者其壤

在外其所吞咽者壤入于內闕然不見其壤有食之者也有內辭也

或外辭也有食之者內于日也注內于日以壤不見于外其不言食

之者何也知其不可知也

疏徐邈云己巳謂二月晦則三月不得有庚戌也明

宣十年四月丙辰十七年六月癸卯皆是前月之晦也則此己巳正月晦以二月者蓋交會之正必主于朔今雖未朔而食著之此月所以正其本亦猶成十七年十月壬申而繫之十一月也取前月之日而冠以後月故不得稱晦以其不得稱晦知非二月晦也穀梁之例書日食凡有四種之別言日不言朔食晦日也言朔不
言日食既朔也不言日不言朔
夜食也言日言朔食正朔也

李氏光地曰日食書日書朔朔日食也書日不書朔朔後食也書朔不書日朔前食也不書日不書朔陰雨食也陰雨食則國都不見而他處見之非靈臺所觀測則未知其為正朔與朔之前後與是以闕之也若夫夜食之說則非日食不占夜猶月食不占晝是以唐一行之作律也上溯往古必使千有餘年日食

必在晝月食必在夜也裏之二十一年連月日食非變也蓋史者異文或曰九月庚戌或曰十月庚辰而夫子兩存之以闕疑如甲戌已丑陳侯鮒卒之例

梅氏文鼎曰案古日食每不在朔者以古用平朔耳古所以用平朔者以日月並紀平度也東漢劉洪作乾象術始知月有遲疾北齊張子信積修二十年始知日有盈縮有此二端以生定朔然而人猶不敢用也至唐李淳風僧一行始用之至今遵用乃驗律之要然非有洛下閔之渾儀張衡之靈憲則測驗且無

其器又何以能加密測愚故曰古人之功不可沒也

桓公三年秋七月壬辰朔日有食之既

杜注既盡也銜

會月掩日故曰食食有上下者行有高下日光輪存而中食者相揜密故日光溢出皆既者正相當而相揜間

疏也然聖人不言月食日而以自食為大闕于所不見疏食既者謂日光盡也銜家之說當日之銜有大如

日者謂之闇虛闇虛當月則月必減光故為月食張衡靈憲曰當日之銜光常不合是謂闇虛在星則星微遇

月則月食若是應每望常食而望亦有不食者由其道度異也日月異道有時而交交則相犯故日月遞食交

在望前朔則日食望則月食交在望後望則月食後月朔則日食交正在朔則日食既前後望不食交正在望

則月食既前後朔不食大率一百七十三日有餘而道始一交非交則不相侵犯故朔望不常有食也道不正

交則日斜照月故月光更盛道若正交則日衝當月故
月光即減日月同會道度相交月揜日光故日食言月
食是日光所衝日食是月體所映故日食常在朔月食
常在望也食有上下者行有高下謂月在日南從南入
食南下北高則食起于下月在日北從北入食則食發
于高是其行有高下故食不同也故異義云月高則其
食虧于上月下則其食虧于下也相揜密者二體相近
正映其形故光得溢出而中食也相揜疎者二體相遠
月近則日遠自人望之則月之所映者廣故日光不復
能見而日食既也日食者實是月映之也但日之所在
則月體不見聖人不言月來食日而云
有物食之以自食為文闕于所不見也

公羊傳既者

何盡也

注光明減盡也

穀梁傳言日朔食正朔也

注朔日食也

既

者盡也有繼之辭也

注盡而復生謂之既

十有七年冬十月朔日有食之

注甲乙者數之紀也晦朔者日月之會也日食

不可以不存晦朔晦朔須甲乙而可推故日食必以書朔日為例

左氏傳冬十月朔

日有食之不書日官失之也天子有日官諸侯有日御

日官居卿以底日禮也日御不失日以授百官于朝

穀梁傳言朔不言日食既朔也

莊公十有八年春王三月日有食之穀梁傳不言日

不言朔夜食也何以知其夜食也曰王者朝日

注何休曰春秋

不言月食日者以其無形故闕疑其夜食何緣書乎鄭君釋之曰一日一夜合為一日今朔日日始出其食有

虧傷之處未復故知此自以夜食夜食則亦屬前月之晦故穀梁子不以爲疑故雖爲天子必

有尊也貴爲諸侯必有長也故天子朝日諸侯朝朔

二十五年夏六月辛未朔日有食之鼓用牲于社左

氏傳夏六月辛未朔日有食之鼓用牲于社非常也

注非

常鼓之月長律推之辛未實七月朔置閏失所致致月錯唯正月之朔慝未作

注正月夏

之四月周之六月謂正陽之月今書六月而傳云唯者明此月非正陽月也慝陰氣日有食之于

是乎用幣于社伐鼓于朝公羊傳日食則曷爲鼓用

牲于社求乎陰之道也以朱絲營社或曰脇之或曰爲

閭恐人犯之故營之 穀梁傳言日言朔食正朔鼓禮

也用牲非禮也天子救日置五麾陳五兵五鼓諸侯置

三麾陳三鼓三兵大夫擊門士擊柝言充其陽也

注凡有聲

皆陽事以壓陰氣充實也

疏五麾者廉信云各以方

色之旌置之五處也五兵者徐邈云矛在東戟在南鉞在西楯在北弓矢在中央廉信與范數五兵與之同是相傳說也五鼓者廉信徐邈並云東方青鼓南方赤鼓西方白鼓北方黑鼓中央黃鼓諸侯三者則云降殺以兩去黑黃二色

二十有六年冬十有二月癸亥朔日有食之

三十年秋九月庚午朔日有食之鼓用牲于社

僖公五年秋九月戊申朔日有食之

十有二年春王三月庚午日有食之

十有五年夏五月日有食之 左氏傳夏五月日有食

之不書朔與日官失之也

文公元年春二月癸亥日有食之

十有五年夏六月辛丑朔日有食之鼓用牲于社 左

氏傳六月辛丑朔日有食之鼓用牲于社非禮也

注得常鼓

之月而于社用牲為非禮日有食之天子不舉伐鼓于社諸侯用幣

予社伐鼓于朝以昭事神訓民事君示有等威古之道也

宣公八年秋七月甲子日有食之

十年夏四月丙辰日有食之

十有七年夏六月癸卯日有食之

成公十有六年夏六月丙寅朔日有食之

十有七年冬十有二月丁巳朔日有食之

襄公十有四年春二月乙未朔日有食之

十有五年秋八月丁巳日有食之

二十年冬十月丙辰朔日有食之

二十有一年秋九月庚戌朔日有食之

冬十月庚辰朔日有食之

二十有三年春王二月癸酉朔日有食之

二十有四年秋七月甲子朔日有食之既疏七月日食既而八月又

食于推步之行必無此理盖古書磨滅致有錯誤劉炫云漢末以來八百餘載考其注記莫不皆爾都無頻月日食之事計天道轉運古今一也後世既無其事前世理亦當然此與二十一年頻月日食理必不然但其字

則變古為篆改篆為隸書則繅以代簡紙以代繅多歷
世代或轉寫誤失其本真執文求義理必不通後之學
者宜知此意也

八月癸巳朔日有食之

二十有七年冬十有二月乙亥朔日有食之

注今長律
推十一月

朔非十二月傳曰辰在申再失閏若
是十二月則為三失閏故知經誤

左氏傳十一月

乙亥朔日有食之辰在申司律過也再失閏矣

注文十
一年三

月甲子至今年七十一歲應有二十六閏今長律推得
二十四閏通計少再閏疏古法十九年為一章章有

七閏從文十一年至襄十三年凡五十七年已成三章
當有二十一閏又從襄十四年至今為十四年又當有

五閏故為應有二十六閏也魯之司律漸失其閏至此年日食之月以儀審望于是始覺其謬遂頓置兩閏以應元正以叙事期然則前閏月為建酉後閏月為建戌十二月為建亥而歲終焉是故明年經書春無冰傳以為時災也若不復頓置二閏則明年春是今之九月十月十一月也今之九月十月十一月無冰非天時之異無緣總書春也

昭公七年夏四月甲辰朔日有食之 左氏傳夏四月

甲辰朔日有食之晉侯問于士文伯曰誰將當日食對曰魯衛惡之衛大魯小公曰何故對曰去衛地如魯地

注衛地承韋也魯地降婁也日食于承韋之末及降婁之始乃息故禍在衛大在魯小也周四月今二月故曰

在降婁 疏 姬譽
之次一名豕韋

于是有災魯實受之

注災發于衛而魯受其餘禍

其大咎其衛君乎魯將上卿

注八月衛侯卒十一月季孫宿卒

公曰詩

所謂彼日而食于何不臧者何也對曰不善政之謂也國無政不用善則自取謫于日月之災

十有五年夏六月丁巳朔日有食之

十有七年夏六月甲戌朔日有食之

左氏傳夏六月

甲戌朔日有食之祝史請所用幣昭子曰日有食之天子不舉伐鼓于社諸侯用幣于社伐鼓于朝禮也平子

禦之曰止也唯正月朔慝未作日有食之于是乎有伐

鼓用幣禮也其餘則否太史曰在此月也

注正月謂建巳正陽之月

也于周為六月于夏為四月四月純陽用事陰氣未動而侵陽災重故有伐鼓用幣之禮也平子以為六月非

正月故太史答言在此月也

日過分而未至

注過春分而未夏至

三辰有災于

是乎百官降物君不舉辟移時樂奏鼓祝用幣史用辭

故夏書曰辰不集于房瞽奏鼓嗇夫馳庶人走此月朔

之謂也當夏四月是謂孟夏平子弗從昭子退曰夫子

將有異志不君君矣

二十有一年秋七月壬午朔日有食之 左氏傳秋七

月壬午朔日有食之公問于梓慎曰是何物也禍福何

為對曰二至二分日有食之不為災日月之行也分同

道也至相過也

注二分日夜等故言同道二至長短極故相過 既日之行天一日一周月之

行天二十九日有餘已得一周日月異道互相交錯月之一周必半在日道裏從外而入內也半在日道表從內而出外也或六入七出或七入六出凡十三出入而與日一會律家謂之交道通而計之一百七十三日有餘而有一交交在望前朔則日食望則月食交在望後望則月食後月朔則日食此自然之常數也交數滿則相過非二至 其他月則為災陽不克也故常為水于是乃相過也

叔輒哭日食昭子曰子叔將死非所哭也八月叔輒卒

二十有二年冬十有二月癸酉朔日有食之

杜注此月有庚戌又

以長律推校前後當為癸卯朔書癸酉誤疏案傳十二月庚戌晉籍諶云云庚戌上去癸酉二十七日若此月癸酉朔其月不得有庚戌也又傳十二月下有閏月晉箕遺云云又云辛丑伐京辛丑是壬寅之前日也二十三年傳曰正月壬寅朔二師圍郊則辛丑是閏月之晦日也又計明年正月之朔與今年十二月朔中有一閏相去當為五十九日此年十二月當為癸卯朔經書癸酉明是誤也故言長律推交十一月小甲戌朔傳有乙酉十二日也又有己丑十六日也十二月大癸卯朔傳有庚戌八日也閏月小癸酉朔傳有閏月辛丑二十九日也明年正月壬寅朔則上下符合矣

二十四年夏五月乙未朔日有食之 左氏傳 夏五月乙未朔日有食之梓慎曰將水昭子曰旱也日過分而陽猶不克克必甚能無旱乎陽不克莫將積聚也

三十有一年冬十有二月辛亥朔日有食之 左氏傳

十有二月辛亥朔日有食之是夜也趙簡子夢童子羸而轉以歌旦占諸史墨曰吾夢若是今而日食何也對曰六年及此月也吳其入郢乎終亦弗克入郢必以庚

辰

注庚日有變日在辰尾故曰以庚辰定四年十一月庚辰吳入郢 疏于天文房心尾為大辰尾是辰後

之星也日在辰尾自謂在辰星庚辰入郢乃謂日是辰日二辰不同而以日在辰尾配庚為庚辰者二辰實雖不同而同名曰辰以其名同故取以為占此則史墨能知非是人情所測此十二月日食彼十一月入郢則是未復其月而云及此月者長律定四年閏十月庚辰吳入郢是十一月二十九日杜云昭二十一年傳曰六年十二月庚辰吳入郢今十一月者并閏數也然則彼是新閏之後且十一月二十九日又其月垂盡故得為及此月

日月在辰尾

注辰尾龍尾也周十二月今之十月日月合朔于辰尾而食

庚午

之日始有謫火勝金故弗克

注謫變氣也庚午十月十九日去辛亥朔四十

一日雖食在辛亥更以始變為占也午南方楚之位也午火庚金也日以庚午有變故災在楚楚之仇敵惟吳故知入郢必吳火勝金者金為火妃食在辛亥亥水也水數六故六年也疏長律此年十月壬子朔故庚午

是十月十九日也從庚午下去十二月辛亥朔為四十一日雖食在辛亥之日而更以庚午為占舍近而取遠自是史墨所見其意不可知也

定公五年春王三月辛亥朔日有食之

十有二年冬十有一月丙寅朔日有食之

十有五年秋八月庚辰朔日有食之

陸氏九淵曰春秋日食三十六而食之既者三日之食與食之深淺皆術家所能知是蓋有數疑若不為變也然天人之際實相感通雖有其數亦有其道昔之聖人未嘗不因天發以自治洵雷震君子以恐懼修省君子無終食之間違仁造次必于是顛沛必于是所以修其身者素矣然洵震之時必因以恐懼修

省此君子所以無失德而盡是天之道焉況日月之青見于上乎遇災而懼側身修行欲銷去之此宣王之所以中興也知天災有可銷去之理則無疑于天人之際而知所以自求多福矣日者陽也陽為君為父苟有食之斯為變矣食至于既變又大矣言日不言朔食不在朔也日之食必在朔食不在朔律差也

觀永案象山此論至為精當此天人感通之

理非有道者不能知考禮者雖得其數不可

不以此理立其本也

哀公十有四年左氏傳夏五月庚申朔日有食之

後漢書志朔會望衡鄰于所交虧薄生焉

宋書志曰行黃道陽路也月者陰精不由陽路故或出其外或入其內出入去黃道不得過六度入十三日有奇而出亦十三日有奇而入凡二十七日而一入一出矣交于黃道之上與日相揜則蝕焉

唐書志大衍日蝕議小雅十月之交朔日辛卯虞劄以數推之在幽王六年開元術定交分四萬三千四百二十九入蝕限加時在晝交會而蝕數之常也詩云彼月而食則維其常此日而食于何不臧日君道也無臍魄

之變月臣道也遠日益明近日益虧望與日軌相會則徙而寢遠遠極又徙而近交所以著臣人之象也望而正于黃道是謂臣干君明則陽斯蝕之矣朔而正于黃道是謂臣壅君明則陽為之蝕矣且十月之交于數當蝕君子猶以為變詩人悼之然則古之太平日不蝕星不孛蓋有之矣若過至未分月或變行而避之或五星潛在日下禦侮而救之或涉交數淺或在陽律陽盛陰微則不蝕或德之休明而有小眚焉則天為之隱雖交

而不蝕此四者皆德教之所由生也四序之中分同道至相過交而有蝕則天道之常如劉歆賈逵皆近古大儒豈不知軌道所交朔望同術哉以日蝕非常故闕而不論黃初己來治律者始課日蝕疎密及張子信而益詳劉焯張胄元之徒自負其術謂日月皆可以密率求是專于律紀者也以戊寅麟德術推春秋日蝕大最皆入蝕限于數應蝕而春秋不書者尚多則日蝕必在交限其入限者不必盡蝕開元十二年七月戊午朔于數

當蝕半彊自交趾至于朔方候之不蝕十三年十二月
庚戌朔于厯當蝕太半時東封泰山還次梁宋間皇帝
徹膳不舉樂不益素服日亦不蝕時羣臣與八荒君長
之來助祭者降物以需不可勝數皆奉壽稱慶肅然神
服雖算術乖舛不宜如此然後知德之動天不俟終日
矣若因開元二蝕曲變交限而從之則差者益多自開
元治律史官每歲較節氣中晷因檢加時小餘雖大數
有常然亦與時推移每歲不等晷變而長則日行黃道

南晷變而短則日行黃道北行而南則陰律之交也或失行而北則陽律之交也或失日在黃道之中且猶有變況月行九道乎杜預云日月動物雖行度有大量不能不小有盈縮故有雖交會而不蝕者或有頻交而蝕者是也故交必稽古史虧蝕深淺加時朏朧陰陽其數相叶者反覆相求由律數之中以合辰象之變觀辰象之變反求律數之中類其所同而中可知矣辯其所異而變可知矣其循度則合于律失行則合于占占道順

成常執中以追變律道逆數常執中以俟變知此之說者天道如視諸掌使日蝕皆不可以常數求則無以稽律數之疎密若皆可以常數求則無以知政教之休咎今更設考日蝕或限術得常則合于數又日月交會大小相若而月在日下自京師斜射而望之假中國食既則南方戴日之下所虧纔半月外反觀則交而不蝕步九服日晷以定蝕分晨昏漏刻與地偕變則宇宙雖廣可以一術齊之矣

蕙田案日食雖云數有定而其為天變固顯然者不知其數一定非也知其一定而不謹天變不加警惕亦非也唐時推日食猶未能密合又不知變差氣差等在尋常食法之外而亦具一定之故謬為月變行五星禦侮之說弗知妄作矣其言里差則有可取畧識梗概而已

宋史志四正食差正交如果壁漸減則有差在內食分

多在外食分少交淺則間遙交深則相薄所觀之地又偏所食之時亦別苟非地中皆隨所在而漸異縱交分正等同在南方冬食則多夏食乃少假均冬夏早晚又殊處南辰則高居東西則下視有斜正理不可均

元史志術法疎密驗在交食然推步之術難得其密加時有早晚食分有淺深取其密合不容偶然推術加時必本于躔離朧朧考求食分必本于距交遠近苟入氣盈縮入轉遲疾未得其正則合朔不失之先必失之後

合朔失之先後則虧食時刻其能密乎日月俱東行而日遲月疾月追日及是為一會交直之道有陽律陰律交會之期有中前中後加以地形南北東西之不同人目高下邪直之各異此食分多寡理不得一者也今合朔既正則加時無早晚之差氣刻適中則食分無強弱之失推而上之自詩書春秋及三國以來所載虧食無不合焉者合于既往則行之悠久自可無弊矣

明史志正德十五年禮部員外郎鄭善夫言日月交食

日食最為難測蓋月食分數但論距交遠近別無四時加減且月小闇虛大八方所見皆同若日為月所揜則日大而月小日上而月下日遠而月近日行有四時之異月行有九道之分故南北殊觀時刻亦異必須據地定表因時求合如正德九年八月辛卯日食臺官報食八分六十七秒而閩廣之地遂至食既時刻分秒安得而同今宜案交食以更律元時刻分秒必使奇零剖析詳盡不然積以歲月躔離眇眇又不合矣

鄭世子書曰道與月道相交處有二若正會于交則食既若但在交前後相近者則食而不既此天之交限也又有人之交限假令中國食既戴日之下所虧纔半化外之地則交而不食易地反觀亦如之何則日如大赤九月如小黑九共縣一線日上而月下即其下正望之黑九必揜赤九似食之既及旁觀有遠近之差則食數有多寡矣春分已後日行赤道北畔交外偏多交內偏少秋分已後日行赤道南畔交外

偏少交內偏多是故有南北差冬至已後日行黃道東畔午前偏多午後偏少夏至已後日行黃道西畔午前偏少午後偏多是故有東西差日中仰視則高旦暮平視則低是故有距午差食于中前見早食于中後見遲是故有時差凡此諸差唯日有之月則無也故推交食惟日頗難欲推九服之變必各據其處考晷景之短長揆辰極之高下庶幾得之術經推定之數徒以燕都所見者言之耳舊云月行內道食多

有驗月行外道食多不驗又云天之交限雖係內道
若在人之交限之外類同外道日亦不食此說似矣
而未盡也假若夏至前後日食于寅卯酉戌之間人
向東北西北觀之則外道食分反多于內道矣日體
大于月月不能盡掩之或遇食既而日光四溢形如
金環故日無食十分之理雖既亦止九分八十秒授
時術日食陽律限六度定法六十陰律限八度定法
八十各置其限度如其定法而一皆得十分今于其

定法下各加一數以除限度則得九分八十餘秒也
崇禎四年夏四月戊午夜望月食光啟預推分秒時
刻方位奏言日食隨地不同則用地緯度算其食分
多少用地經度算其加時早宴月食分秒海內並同
止用地經度推求先後時刻臣從輿地圖約畧推步
開載各布政司月食初虧度分益食分多少既天下
皆同則餘率可以類推不若日食之經緯各殊必須
詳備也又月體一十五分則盡入闇虛亦十五分止

耳今推二十六分六十秒者蓋闔虛體大于月若食時去交稍遠則月體不能全入闔虛止從月體論其分數是夕之食極近于交故月入闔虛十五分方為食既更進一十五分有奇乃得生光故為二十六分有奇如回回術推十八分四十七秒畧同此法也

冬十月辛丑朔日食新法預推順天見食二分一十二秒應天以南不食大漠以北食既例以京師見食不及三分不救護光啟言月食在夜加時早晚苦無

定據惟日食案畧定時無可遷就故立法疎密此為
的證臣等纂輯新法漸次就緒而向後交食為期尚
遠此時不與監臣共見至成書後將何徵信且是食
之必當測候更有說焉舊法食在正中則無時差今
此食既在日中而新法仍有時差者蓋以七政運行
皆依黃道不由赤道舊法所謂中乃赤道之午中非
黃道之正中也黃赤二道之中獨冬夏至加時正午
乃得同度今十月朔去冬至度數尚遠兩中之差二

十三度有奇豈可因加時近午不加不減乎適際此
日又值此時足可驗時差之正術一也本方之地經
度未得真率則加時難定其法必從交食時測驗數
次乃可較勘畫一今此食依新術測候其加時刻分
或前後未合當取從前所記地經度分斟酌改定此
可以求里差之真率二也時差一法但知中無加減
而不知中分黃赤今一經目見人人知加時之因黃
道因此推彼他術皆然足以知學習之甚易三也即

分數甚少亦宜詳加測候以求顯驗帝是其言至期
光啟率監臣預點日晷調壺漏用測高儀器測食甚
日晷高度又于密室中斜開一隙置窺筭遠鏡以測
虧圓盡日體分數圖板以定食方其時刻高度悉合
惟食甚分數未及二分于是光啟言今食甚之度分
密合則經度里差已無煩更定矣獨食分未合原推
者蓋因太陽光大能減月魄必食及四五分以上乃
得與原推相合然此測用密室窺筭故能得此分數

倘止憑目力或水盆照映則眩耀不定恐少尚不止此也

又曰宋仁宗天聖二年甲子歲五月丁亥朔司天推當食不食諸術推算皆云當食夫于法則實當食而于時則實不食今當何以解之蓋日食有變差一法月在陰律距交十度強于法當食而獨此日此地之南北差變為東西差故論天行則地心與日月相參值實不失食而從人目所見則日月相距近變為遠

實不得食顧獨汴京為然若從汴以東數千里則漸見食至東北萬餘里外則全見食也夫變差時時不同或多變為少或少變為多或有變為無或無變為有推步之難全在此等

五年九月十五日月食監推初虧在卯初一刻光啟推在卯初三刻回回科推在辰初初刻三法異同致奉詰問至期測候陰雲不見無可徵驗光啟具陳三法不同之故言時刻之加減由于盈縮遲疾兩差而

盈縮差舊法起冬至新法起最高最高有行分惟
宋紹興間與夏至同度郭守敬後此百年去離一度
有奇故未覺今最高在夏至後六度此兩法之盈縮
差所以不同也遲疾差舊法只用一轉周新法謂之
自行輪自行之外又有兩次輪此兩法之遲疾差所
以不同也至于回回又異者或由于四應或由于里
差臣實未曉其故總之三家俱依本法推步不能變
法遷就也將來有宜講求者二端一曰食分多寡日

食時陽晶晃耀每先食而後見月食時游氣紛侵每
先見而後食其差至一分以上今欲灼見實分有近
造窺筭日食時于密室中取其光景映照尺素之上
初虧至復圓分數真確畫然不爽月食用以仰觀二
體離合之際鄴鄂著明與目測迥異此定分法也一
曰加時早晚定時之術壺漏為古法輪鐘為新法然
不若求端于日星晝則用日夜則任用一星皆以儀
器測取經緯度數推算得之此定時法也二法既立

則諸術之疎密毫末莫遁矣古今月食諸史不載日食自漢至隋凡二百九十三而食于晦者七十七晦前一日者三初二日者三其疎如此唐至五代凡一百一十而食于晦者一初二日者一稍密矣宋凡一百四十八無晦食者更密矣猶有推食而不食者十三元凡四十五亦無晦食猶有推食而不食者一食而失推者一夜食而晝晝者一至加時差至四五刻者當其時已然可知高遠無窮之事必積時累世乃

稍見其端倪故漢至今千七百歲立法者十有三家而守敬為最優尚不能無數刻之差而況于沿習舊法者何能責其精密哉

六年李天經進交食之議四一曰日月景徑分恒不一蓋日月有時行最高有時行最卑因相距有遠近見有大小又因遠近得太陰過景時有厚薄所以徑分不能為一二曰日食午正非中限乃以黃道九十度限為中限蓋南北東西差俱依黃道則時差安得

不從黃道論其初末以求中限乎且黃道出地平上
兩象限自有其高亦自有其中此理未明或宜加反
減宜減反加時不合者由此也三曰日食初虧復圓
時刻多寡恒不等非二時折半之說蓋視差能變實
行為視行則以視差較食甚前後鮮有不參差者夫
視差既食甚前後不一又安能令視行前後一乎今
以視行推變時刻則初虧復圓其不能相等也明矣
四曰諸方各以地經推算時刻及日食分蓋地面上

東西見日月出沒各有前後不同即所得時刻亦不同故見食雖一而時刻異此日月食皆一理若日食則因視差隨地不一即太陰視距不一所見食分亦異焉

新法算書步交食之術有二一曰加時早晚一曰食分淺深加時者日食于朔月食于望當豫定其食甚在某時刻分秒也食分者月所借之日光食于地景地所受之日光食于月景當豫定其失光幾何分秒也加時早

晚非在日月正相會相望之實時而在人目所見儀器所測之視時乃視時無均度可推故日月兩食皆先求其實時既得實時然後從視處密求日食之定時惟月食則實時即近視時也然日與月實相會之度分未定即欲求其實時無從可得故須先推中會時計其平行及自行而得均數然後以均數加減求得其實會因得其實時矣若食甚之前為初虧食甚之後為復圓此兩限間亦應推定時刻分秒其法于前後數刻間推步日

躔月離求其實行視行

月有遲疾經時則生變易故宜近取

以得起復之

間時刻久近也食分多寡謂日食時月體掩日體若干月食時月體入地景若干也其法以日月兩半徑較太陰距黃道度分得其大小次求二曜距交遠近與古法不異第日月各有最高庫景徑因之小大黃白距度有廣狹食限為之多少至於日食三差尤多曲折此為異矣

欲定本地之日食分必先定本地之蒙氣差以限本地

之視徑又宜累驗本地之食分加時然後酌量消息蒙
差視徑可得而定也今所考求酌定者太陽在最高得
徑三十○分在最庫徑三十一分太陰不分朔望蒙氣稍薄
也故在最高視徑三十○分三十○秒在最庫視徑三十
四分四十○秒地景最小者四十三分最大者四十七
分日月行最高最庫處之間視徑亦漸次不一

食限者日月行兩道各推其經度距交若干為有食之
始也而日與月不同月食則太陰與地景相遇兩周相

切以其兩視半徑較白道距黃道度又以距度推交周
度定食限若日食則太陽與太陰相遇雖兩周相切其
兩視半徑未可定兩道之距度為有視差必以之相加
而得距度故特論半徑則日食之二徑狹月食之二徑
廣論日食之限反大于月食之限以視差也

太陰食限表中地景半徑最大者先定四十七分太陰
半徑最大者一十七分二十〇秒并得一度〇四分二
十〇秒日月兩道之距在此數以內可有月食

可食者
可不食

也以此距度推其相值之交常得一十二度二十八分

為月食限推法最大距度

四度五十八分半

與象限九十度若

距度與交常之弧也其最小者地半景定四十三分月

半徑一十五分一十五秒并得五十八分一十五秒若

距度與之等者依前法推交常度得一十一度一十六

分此限以內月過景必有食也

必食者無不食也

抑此兩者皆

論實望時之食限耳若論平望其限尤寬

太陽食限表中太陽之最大半徑一十五分三十秒

太陰之最大半徑一十七分二十〇秒并得三十二分五十〇秒所謂二徑折半也以此推相值之交常為六度四十〇分是太陽不論視差不分南北正居實會之食限也第日食不在天頂即有高庳視差太陰每偏而在下交會時以此差故或就近於太陽或移遠隨地隨時各各不同安得以實度遽定日食之限乎測太陰交食時最大高庳差得一度〇四分

因距遠五十
四地半徑故

減太陽

之最大高庳差三分餘一度〇一分

此為太陰偏南之
極多者凡日食時

必有一方能見其然是以加二徑折半得總視距度一
為大地公共之最大差

度三十三分五十〇秒外此即無日食在其內則可食
依前法求食限得兩交前後各一十八度五十〇分為
兩大視徑折半之限也若以小半徑求食限與前差度
并得一度三十一分有奇推相值之交周度一十七度
四十八分為小視徑折半之日食限若日月會入此限
內者日必食但非總大地能見必有地能見耳若以中
會論食限又須加入實會距中會之度其最大弧三度

則中會有食之限二十餘度

欲知此月內有無交食則以食限求之欲知此食食分
幾何則以距度求之距度者在月食為太陰心實距地
景之心兩心愈相近月食分愈多在日食為日月兩心
以視度相距其近其遠皆以目視為準不依實推蓋定
朔為實交會天下所同而人見日食東西南北各異所
以然者皆視度所為也

太陰在食限內過地景其兩心最相近時為食甚而食

分必多欲知食甚之處用距度求之蓋距度與地半景

及月半徑相減得月入景之分

此言分者天周度數之分非平分月徑之分也

如兩半徑得一度距度四十○分相減餘二十分為所求月入景之分也但距度與半景或等或不等若過不及之分小于月半徑則月不全入景而止食其半或大半或少半而已若距度小于半景者為太陰之正半徑則雖全食隨復生光其食分即太陰之全徑以月自行推之若絕無距度即太陰遇景正在兩交則并其兩半

徑可推月食之分也

食甚前初虧也食甚後復圓也兩限間之時刻多寡其緣有三一在太陰本時距度因距度或多或寡每食不同即太陰入景淺深不同淺則時刻必少深則時刻必多其二在月及景兩視半徑半徑小太陰過之所須時刻少半徑大太陰過之所須時刻多其三在太陰自行自行有時速有時遲雖則距度同視徑同而自行遲疾不同即所須時刻不同矣

月食生於地景景生於日故天上之實食即人所見之
視食無二食也日食不然有天上之實食有人所見之
視食其食分之有無多寡加時之早晚先後各各不同
推步日食難于太陰者以此其推算視食則依人目與
地面為準凡交會者必參相直不參直不相揜也日之
有實食也地心與月與日參居一線之上也其有視食
也人目與月與日參居一線之上也人目居地面之上
與地心相距之差為大地之半徑則所見日食與實食

恒偏左偏右其所指不得同度分是生視差而人目所
參對之線不得為實會而特為視會視會與實會無異
者惟有正當天頂之一點過此以地半徑以日月距地
之遠測太陽及太陰實有三等視差其法以地半徑為
一邊以太陽太陰各距地之遠為一邊以二曜高度為
一邊成三角形用以得高度差一也又偏南而變緯度
得南北差二也以黃道九十度限偏左偏右而變經度
得東西差三也因東西視差故太陽與太陰會有先後

遲速之變二曜之會在黃平象限東即未得實會而先得視會若在黃平象限西則先得實會而後得視會所謂中前宜減中後宜加者也因南北視差故太陰距度有廣狹食分有大小之變如人在夏至之北測太陰得南北視差即以加于太陰實距南度以減於實距北度又東西南北兩視差皆以黃平象限為主蓋正當九十度限絕無東西差而反得最大南北差距九十度漸遠南北差漸小東西差漸大至最遠乃全與高度差為二

也三差恒合為句股形高庠其弦南北其股東西其句至極南則弦與股合至極東極西則弦與句合也

東西南北高庠三差之外復有三差不生於日月地之三徑而生於氣氣有輕重有厚薄各因地因時而三光之視差為之變易有三一曰清蒙高差是近於地平為地面所出清蒙之氣變易高下也二曰清蒙徑差亦因地上清蒙之氣而人目所見太陽本徑之大小為所變易也三曰本氣徑差本氣者四行之一即內經素問所

謂大氣地面以上月天以下充塞太空者是也此比於地上清蒙更為精微無形質而亦能變易太陽之光照使目所見之視度隨地隨時小大不一也

梅氏文鼎日食附說恒年表以首朔為根何也曰首朔者年前冬至後第一朔也因算交會必于朔望故以此為根也太陽平引與其經度不同何也曰太陽引數從最高衝起算經度從冬至起算也冬至定于初宮初度最高衝在冬至後六七度且每年有行分

此西法與古法異者也日定均者即古法之盈縮差也月定均者遲疾差也距弧者平朔與實朔進退之度也距時者平朔實朔進退之日時也因兩定均生距弧因距弧生距時即古法之加減差也平朔既有進退矣則此進退之時刻內亦必有平行之數故各以加減平行而為實引也實引既不同平引則其均數亦異故又有實均以生實距弧及實距時也夫然後以之加減平朔而為實朔也平朔古云經朔實朔

古云定朔然古法定朔即定于加減差定盈縮定遲疾則惟于算交食用之而西法用于定朔此其微異者也朔有進退則交周亦有進退故有實交周案古法亦有定交周其法相同

閏平朔者古經朔也實朔者古定朔也何以又有視朔曰此測驗之理因加減時得之古法所無也何以謂之加減時曰所以求實朔時太陽加時之位也時刻有二其一為時刻之數其一為時刻之位凡布算

者稱太陽右移一度稍弱為一日又或動天左旋行三百六十一度稍弱為一日此則天行之健依赤道而平轉其數有常于是自子正歷丑寅復至子正因其運行之一周而均截之為時為刻以紀節候以求中積所謂時刻之數也凡測候者稱太陽行至某方位為某時為某刻此則太虛之體依赤道以平分其位一定于是亦自子正歷丑寅復至子正因其定位之一周而均分之為時為刻以測加時以候凌犯所

謂時刻之位也之二者並宗赤道宜其同矣然惟二

分之日黃赤同點

經緯並同

二至之日黃赤同經

緯異經同則

數與位合

所算時刻之數太陽即居本位與所測加時之位一一相符

不用加減

時其過此以往則二分後有加分加分者太陽所到之位
在實時西二至後有減分減分者太陽所到之位
在實時東也然則所算實朔尚非實時乎曰實時
也實時何以復有此加減曰正惟實時故有此加減
若無此加減非實時矣蓋此加減時分不因里差而

異

九州萬國加減悉同非同南北東西差之隨地而變

亦不因地平上高弧而

改

高弧雖有高下加減時並同非若地半徑及蒙氣等差之以近地平多近天頂少

而獨與

實時相應

但問所得實時入某節氣或在分至以後或在分至以前其距分至若同即其加減

時亦同是與實時相應也

故求加減時者本之實時而欲辨實時

之真者亦即徵諸加減時矣其以二分後加二至後

減何也曰升度之理也凡二分以後黃道斜而赤道

直故赤道升度少升度少則時刻加矣二至以後黃

道以腰圍大度行赤道殺狹之度故赤道升度多升

度多則時刻減矣 加減時即視時也 一曰用時其實朔時 一曰平時 加減時之用有二 其一加減實時為視時 則施之測驗可以得其正位 其一反用加減以變視時為實時 則施之推步可以得其正算 然其理無二 故其數亦同也 古今測驗而得者 並以太陽所到之位為時 故曰加時 言太陽加臨其地也 然則皆視時而已

月距地者 何即月天之半徑也 月天半徑而謂之距

地者地處天中故也地恒處天中則半徑宜有恒距而時時不同者生于小輪也月行小輪在其高度則距地遠矣在其卑度則距地近矣每度之高卑各異故其距地亦時時不同也

日半徑月半徑者言其體之視徑也論其真體日必大于月論其視徑日月畧相等所以能然者日去人遠月去人近也然細測之則其兩視徑亦時時不等此其故亦以小輪也日月在小輪高處則以遠目而

損其視徑在其卑處則以近目而增其視徑矣并徑者日月兩半徑之總數也兩半徑時時不同故其并徑亦時時不同而食分之深淺因之虧復之距分因之矣

總時者何也以求合朔時午正黃道度分也何以不言度而言時以便與視朔相加也然則何不以視朔變為度曰日實度者黃道度也時分者赤道度也若以視朔時變赤道度亦必以日實度變赤道度然後

可以相加今以日實度變為時即如預變赤道矣此
巧算之法也其必欲求午正黃道何也曰以求黃平
象限也

即表中九十度限

何以為黃平象限曰以大圈相交

必互相均剖為兩平分故黃赤道之交地平也必
皆有半周百八十度在地平之上

黃道赤道地平並為渾圓上大圈故

其相交必皆中剖

其勢如虹若中剖虹腰則為半周最高之

處而兩旁各九十度故謂之九十度限也此九十度
限黃赤道並有之然在赤道則其度常居正午以其

兩端交地平常在卯正酉正也黃道則不然其九十

度限或在午正之東或在午正之西時時不等

惟二至度

在午正則九十度限亦在午正與赤道同法此外則無在午正者而且時時不同矣

其兩端交

地平亦必不常在卯正酉正

亦惟二至度限則其交地平

之處即二分點而黃道與赤道同居卯酉此外則惟赤道常居卯酉而黃道之交于地平必一端在赤道之外而居卯酉南一端在赤道之內而居卯酉北

而時時不等故也

黃道東交地平

在卯正南其西交必酉正北而九十度限偏于午規之西若東交地平在卯正北其西交地平必酉正南而九十度限偏于午正之東則半周如虹時時轉動勢使然也

蓋黃道在地平上半

周之度自此中分則兩皆象限若從天頂作線過此
以至地平必成三角而其勢平過如十字故又曰黃

平象限也

地平圓為黃道所分亦成兩半周若從天頂作弧線過黃平象限而引長之成地平

經度半周必分地平之兩半周為四象限而此經線必北過黃極與黃經合而為一問黃平象

限在午正必二至日有之乎曰否每日有之也凡太

陽東陞西沒成一晝夜則周天三百六十度皆過午

正而西故每日必有夏至冬至度在午正時此時此

刻即黃平象限與子午規合而為一每日只有二次

也自此二次之外二至必不在午正而黃平象限亦必不在二至矣黃平象限表以極出地分何也曰地平上黃道半周中折之為黃平象限其兩端距地平不等而自非二至在午正則黃道之交地平必一端近北一端近南極出地漸以高則近北之黃道漸以出近南之黃道漸以沒而黃平象限亦漸以移此所以隨地立表也求黃平象限何以必用總時曰黃平象限時時不同即午規之度亦時時不同是午正黃

道與黃平象限同移也則其度必相應是故得午正

即得黃平

黃平限為某度其午正必為某度謂之相應然則午正為某度即黃平限必某度矣

故得此可以知彼

而總時者午正之度也此必用總時之理

也日距限分東西何也曰所以定時差之加減也

凡用

時差日在限西則加日在限東則減

日距地高何也曰所以求黃道之

交角也

時差氣差並生于交角又生于限距地及限距日

二者交食之關鍵

而非黃平象限無以知之矣

日距地高何也謂合朔時太陽之地平緯度也亦曰

高弧高弧之度隨節氣而殊故論赤緯之南北赤緯之南北同矣又因里差而異故論極出地極出地同矣又以加時而變故又論距午刻分極出地者南北里差距午刻分者東西里差也合是數者而日距地平之高可見矣其必求高弧者何也所以求月高下差也高下差在月而求日距地高者日食時經緯必同度故日在地平之高即月高也何以為月高下差曰合朔時太陰之視高必下于真高其故何也月

天在日天之內其間尚有空際故地心與地面各殊
地面所見謂之視高以較地心所見之真高往往變
高為下以人在地面旁視而見其空際也故謂之月

高下差

地心見食謂之真食地面見食謂之視食有時反不見食見視食時反非地心之真食縱

使地心地面同得見食而食分淺深亦必不同凡此皆月高下差所為也

月高下差時

不同其緣有二其一為月小輪高卑在小輪卑處月
去人近則距日遠而空際多高下差因之而大矣在
小輪高處月去人遠則距日近而空際少高下差因

之而小矣其一為高弧高弧近地平從旁視而所見
空際多則高下差大矣高弧近天頂即同正視而所
見空際少則高下差小矣

若高弧竟在天頂即與地
心所見無殊無高下差

小輪高卑天下所同高弧損益隨地各異故當兼論
也

兩圈交角何也曰日所行為黃道圈以黃極為宗者
也人在地平上所見太陽之高下為地平經圈以天
頂為宗者也此兩圈者各宗其極則其相遇也必成

交角矣因此交角遂生三差日食必求三差故先論
交角也三差之內其一為地平緯差即高下差其一
為黃道經差即東西差其一為黃道緯差即南北差
此三差者惟日食在九十度限則黃道經圈與地平
經圈相合為一而無經差故但有一差

無經差則但有緯差是無

東西差而有南北差也而兩經緯既合為一則地平之高下差又即為黃道之南北差而成一差

若

日食不在九十度而或在其東或在其西則兩經圈
不能相合為一遂有三差

月高下差恒為地平高弧之緯差而黃道經圈自與

黃道為十字正角不與地平經合以生經度之差角
是為東西差又黃道上緯度自與黃道為平行不與
地平緯度合以生緯度之差角是為南北差東西南
北並主黃道為言與地平之高下差相得而成句股
形則東西差如句南北差如股而高
下差常為之弦合之則成三差也 因此三差有此

方見日食彼方不見或此見食分深彼見食分淺之
殊故交食重之而其源皆出于交角三差既為句股

形則有兩圈之交角即有其餘角而交角所對者為

氣差

即南
北差

餘角所對者為時差

即東
西差

定交角何也所以求三差之真數也何以為三差真

數曰日食三差皆人所見太陰之視差而其根生于交角則黃道之交角也殊不知太陰自行白道與黃道斜交其交于地平經圈也必與黃道之交不同角則所得之差容有未真今以月道交黃道之角加減之為定交角以比兩圈交角之用為親切耳

時差古云東西差其法日食在東則差而東為減差減差者時刻差早也日食在西則差而西為加差加差者時刻差遲也其故何也太陽之天在外太陰之

天在內並東升而西降而人在地面所見之月度既
低于真度則其視差之變高為下者必順于黃道之

勢故合朔在東陞之九十度必未食而先見

限東一象限東

下西高故月之真度尚在太陽之西未能追及于日
而以視差之變高為下亦遂能順黃道之勢變西為

東見其掩日矣若合朔在西降之九十度必先食而後見

限西

一象限黃道西下東高故月之真度雖已侵及太陽
之體宜得相揜而以視差之故變高為下遂順黃道
之勢變東而西但見其在太陽之西尚遠而不能揜日矣而東西之界並自黃道

九十度限而分此黃平象限之實用也問日月以

午前東升午後西降何不以午正為限而用黃平象
限乎曰此西法之合理處也何以言之日月之東升
西降自午正而分者赤道之位終古常然者也日月
之視差東減西加自九十度限而分者黃道之勢頃
刻不同者也若但從午正而分則加減或至于相反
授時古法之交食有時而疎此其一端也問加減何
以相反曰黃平限既與午正不同度則在限為西者
或反為午正之東在限為東者或反為午正之西日

食遇之則加減相違矣

近時距分者何也即視朔時或加或減之時刻分也
所以有此加減者時差所為也然何以不徑用時差
曰時差者度分也以此度分求月之所行則為時分
矣 近時何也所推視朔時與真朔相近之時也食
在限東此近時必在視朔時以前故減食在限西近
時必在視朔時以後故加

近總時何也近時之午正黃道度也朔有進退午正

之黃道亦因之進退故仍以近時距分加減視朔午
正度為本求之近時午正度既有近時又有近時之
午正度則近時下之日距限及限距地高日距地高
以及月高下差兩圈交角凡在近時應有之數一一
可推因以得近時之時差矣既得時差可求視行

視行者何也即近時距分內人目所見月行之度也
何以有此視行曰時差所為也蓋視朔既有時差則
此時差所到之度即視朔時人所見月行所到差于

實行之較也視朔既改為近時則近時亦有時差而
又即為人所見近時月行所到差于實行之較矣此
二者必有不同則此不同之較即近時距分內人所
見月行差于月實行之較矣故以此較分加減時差
為視行也本宜用前後兩小時之時差較加減月實
行為視行如用距分減視朔者則取視朔前一小時
之時差若距分加視朔者則取視朔後一
小時之時差各取視朔時差相減得較
以加減月實行即為一小時之視行再用三率比
例得真時距分法為月視行與一小時若時差度與

真時距分也今以近時內之視行取之其所得真時距分等何以明其然也曰先得時差即近時距分之實行也實行之比例等則視行之比例亦等問視行之較一也而或以加或以減其理云何曰凡距分之時刻變大則所行之度分變少故減實行為視行若距分之時刻變小則所行之度分變大故加實行為視行假如視朔在黃平限之東時差為減差而近時必更在其東其時差亦為減差乃近時之時差所減

大于視朔所減是為先小後大其距分必大于近時
距分而視行小于實行其較為減又如視朔在黃平
限之西時差為加差而近時必更在其西時差亦為
加差乃近時之時差所加大于視朔所加是亦為先
小後大其距分亦大于近時距分而視行亦小于實
行故其較為減二者東西一理也若視朔在黃平限
東其時差為減而近時時差之所減反小于視朔所
減又若視朔在黃平限西其時差為加而近時時差

之所加反小于視朔所加此二者並先大後小則其距分之時刻變小矣時刻變小則視行大于實行而其較應加東西一理也

真時距分者何也即視朔時或加或減之真時刻也其數有時而大于近時距分亦有時而小于近時距分皆視行所生也視行小于實行則真時距分大于近時距分矣視行大于實行則真時距分小于近時距分矣其比例為視行度于近時距分若時差度與

真時距分也 真時何也所推視朔之真時刻也真時在限東則必早于視朔之時真時在限西則必遲于視朔之時此其于視朔並以東減西加與近時同惟是真時之加減有時而大于近時有時而小于近時則惟以真時距分為斷不論東西皆一法也若真時距分大于近時距分而在限東則真時更先于近時在限西則真時更後于近時是東減西加皆比近時為大也若真時距分小于近時距分而在限東則

真時後于近時在限西則真時先于近時是東減西加皆比近時為小也

真總時何也真時之午正黃道也故仍以真時距分

加減視朔之總時為總時

即是改視朔午正度為真時午正度

近時

既改為真時即食甚時也然容有未真故復考之考之則必于真時復求其時差而所以求之之具並無

異于近時所異者皆真時數耳

謂日距限限距地高日距地高月高下差

兩圈交角等項並從真時立算

是之謂真時差既得真時差乃別求

真距度以相參考則食甚定矣

考定真時
全在此處

何以為

真距度曰即真時距分內應有之月實行也蓋真時
差是從真時逆推至視朔之度真時距分內實行是
從視朔順推至真時之度此二者必相等故以此考
之考之而等則真時無誤故即命為食甚定時也其
或有不等之較分則以法變為時分而損益之于是
乎不等者亦歸于相等是以有距較度分考定之法
也距較度分者距度之較也損益分者距時之較也

其比例亦如先得時差度與真時距分故可以三率求也 真時差大者其距時亦大故以益真時距分益之則減者益其減原在限東而真時早者今乃益早若加者亦益其加原在限西而真時遲者今則益遲矣真時差小者其距時亦小故以損真時距分損之則減者損其減原在限東而真時早者今改而稍遲若加者亦損其加原在限西而真時遲者今改而稍早矣如是考定真時距分以加減視朔為真時即

知無誤可謂之考定食甚時也

氣差古云南北差準前論月在日內人在地內得見其間空際故月緯降高為下夫降高為下則亦降北

為南矣此所以有南北差也

南北差生于地勢中國所居在赤道之北北高

南下故也

然又與高下差異者自天預言之曰高下自黃

道言之曰南北惟在正午則兩者合而為一高下差即為南北差其餘則否氣差與時差同根故有時差即有氣差而前此諸求但用時差者以食甚之時未

定重在求時也今則既有真時矣當求食分故遂取

氣差也

時差氣差並至真時始確

定交周者何也真時之月距交度也食甚既定于真時則一切視差皆以食甚起算故必以實朔交周改為食甚之交周斯之謂定交周也月實黃緯者食甚時月行實距黃道南北之緯度也月視黃緯者食甚時人所見月距黃道南北緯度則氣差之所生也月行白道日行黃道惟正交中交二點月穿黃道而過

正在黃道上而無距緯其距交前後並有距緯而每
度不同然有一定之距是為實緯實緯因南北差之
故變為視緯即無一定之距隨地隨時而異但其變
也皆變北為南假如月實緯在黃道北則與黃道實
遠者視之若近焉故以氣差減也若月實緯在黃道
南則與黃道實近者視之若遠焉故以氣差加也至
若氣差反大于實緯則月雖實在黃道北而視之若
在南故其氣差內減去在北之實緯而用其餘數為

在南之視緯也

并徑減距者何也并徑所以定食分減距所以定不食之分也距者何也即視緯也并徑則日月兩半徑之合數也假令月行黃道北其北緯與南北差同則無視緯可減而并徑全為食分其食必既其餘則皆有距緯之減而距大者所減多其食必淺距小者所減少其食必深是故并徑減餘之大小即食分之所由深淺也若距緯大于并徑則日月不相及或距緯

等于并徑則日月之體相摩而過不能相掩必無食
分矣并徑內又先減一分何也曰太陽之光極大故
人所見之食分必小于真食之分故預減一分也然
則食一分者即不入算乎曰非也并徑之分度下分
也每六十分為一度食分之分太陽全徑之分也以太陽全徑十平分
之假令太陽全徑三十分則以三為一分是故并徑所減之一分于食分
只二十餘秒問日月兩半徑既時時不同則食分何
以定曰半徑雖無定而比例則有定但以并徑減餘

與太陽全徑相比則分數覩矣

分太陽全徑為十分即用為法以分并徑

減距之餘分定其所食為十分中幾分

有時太陰徑小于太陽則雖兩

心正相掩而四面露光術家謂之金環是其并徑亦

小于太陽全徑雖無距緯可減而不得有十分之食

故也

日食月行分者何也乃自虧至甚之月行度分也

自甚

至復同用

其法以并徑減一分常為弦視緯常為句句弦

求股即得自食甚距虧與復之月行度分矣

前總時何也即食甚前一小時之午正度也得此午正度即可得諸數以求前一小時之時差謂之前時差前時差與真時差之差分即視行與實行之差分故以差分加減實行得視行也假如日在限西而前時差大于真時差是初虧所加多而食甚所加反少也以此求虧至甚之時刻則變而小矣時刻小則行分大故以差分加實行為視行若日在限西而前時差小于真時差是初虧所加少而食甚所加漸多也

以此求虧至甚之時刻則變而大矣時刻大則行分必小故以差分減實行為視行日在限東而前時差大于真時差是初虧所減多而食甚所減漸少也以此求虧至甚之時刻則變而大矣時刻大者行分小故以差分減實行為視行若日在限東而前時差小于真時差是初虧所減少而食甚所減反多也以此求虧至甚之時刻則變而小矣時刻小者行分大故以差分加實行為視行食甚定交角滿象限不用

差分何也無差分也何以無差分曰差分者時差之較也食甚在限度即無食甚時差無可相較故初虧徑用前時差復圓徑用後時差又食甚在限度則初虧距限東而前時差恒減復圓距限西而後時差恒加減時差則初虧差而早加時差則復圓差而遲其距食甚之時刻並變而大也時刻大者行分小故皆減實行為視行

又若初虧復圓時定交角滿象限亦無差分而徑用食甚之時差減實行

為視行與此同法其初虧復圓距食甚之刻分亦皆變大而行分變小也視行之理此為較著

初

虧距時分者初虧距食甚之時刻也用上法得視行為食甚前一小時之數而初虧原在食甚前則其比例為視行之于一小時猶日食月行之于初虧距時故可以三率取之也既得此初虧距分則以減食甚而得初虧時刻也

後總時者即食甚後一小時之午正度分也用此午正度得諸數以求後一小時之時差為後時差又以後時差與真時差相較得差分以加減實行為視行

並同初虧但加減之法並與初虧相反假如日在限
西而後時差大于真時差是食甚所加少而復圓所
加多則甚至復之時刻亦變而大矣時刻大者行分
小故以差分減實行為視行若日在限西而後時差
小于真時差是食甚所加多而復圓所加反少則甚
至復之時刻亦變而小矣時刻小者行分大故以差
分加實行為視行假如日在限東而後時差大于真
時差是食甚所減少而復圓所減反多則甚至復之

時刻變而小矣時刻小者行分大故以差分加實行
為視行若日在限東而後時差小于真時差是食甚
所減多而復圓所減少則甚至復之時刻變而大矣
時刻大者行分小故以差分減實行為視行 復圓
距時分三率之理並與初虧同惟復圓原在食甚後
故加食甚時刻為復圓時刻

問定交角滿象限以上反其加減何也曰此變例也
西法西加東減並以黃道九十度限為宗今用定交

角則是以白道九十度限為宗而加減因之變矣問
白道亦有九十度限乎曰以大圈相交割之理徵之
則宜有之矣何則月行白道亦分十二宮則亦為大
圈其交于地平也亦半周在地平上則其折半之處
必為白道最高之處而亦可名之為九十度限矣

或可

名白道
度限

若從天頂作高弧過此度以至地平則成十

字正角而其圈必上過白道之極成白道經圈與黃

平象限同

黃平象限上十字經圈中天頂與黃
道極故亦成黃道經圈與此同理

月在

此度即無東西差而南北差最大與高下差等

前論月在

黃平象限無東西差而即以高下差為南北差其理正是如此但月行白道當以白道為主而論其東西

南北始為親切

若月在此度以東則差而早宜有減差在此

度以西則差而遲宜有加差但其加減有時而與黃

平象限同有時而與黃平象限異故有反其加減之

用也問如是則白道亦有極矣極在何所曰白道有

經有緯

凡東西差皆白道經度南北差皆白道緯度

則亦有南北二極為

其經緯之所宗但其極與黃極恒相距五度以為定

緯

雖亦有小小增減而大致不變

其經度則歲歲遷動至滿二百四

十九交而偏於黃道之十二宮則又復其始

約其數十九年

有奇

法當以黃極為心左右各以五緯度為半徑作一

小圓以為載白道極之圈再以正交中文所在宮度折半取中即于此度作十字經圈必串白道極與黃

道極矣則此圈之割小圓點即白道極也問何以知

此圈能過黃白兩極也曰此圈于黃道白道並作十

字正角故也

凡大圈上作十字圈必過其極

問此圈能串兩極則限

度常在此度乎曰不然也此度能串黃白兩極而未
必其串天頂如黃道上極至交圈也若限度則必串
天頂以過白極而未必其過黃極如黃道上之黃平
限也是故白道上度處處可為限度亦如黃道上度
處處可為黃平限但今在地平上之白道半周某度
最高即其兩邊距地平各一象限從此度作十字經
圈必過天頂而串白道之兩極何也此圈過地平處
亦皆十字角即與地平經圈合而為一所謂月高下

差即在此圈之上矣

惟白道半交為限度能與黃平
限同度此外則否況近交乎故

必用定
交角也

開定交角者所以變黃道交角為白道交角也然何

以不先求白道限度曰交角者生於限度者也交角

變則限度移矣故先得限度可以知交角

交角之向
背以距限

東西而異交角之大
小以距限遠近而殊

而既得交角亦可以知限度故

不必復求限度也其加減以五度何也曰取整數也

古測黃白大距為六度

以西度通之得五
度五十四分奇

西測只五

度奇而至于朔望又只四度五十八分半今論交角

故祇用整數也

若用弧三角法求白道限度所在及其距地之高並可得交角細數然所

差不多蓋算交食必在朔望又必在交前交後故也

問五度加減後何以有異

號不異號之殊曰近交時白道與黃道低昂異勢者

也

惟月在半交能與黃道平行亦如二至黃道之與赤道平行也若交前交後斜穿黃道而過不能與

黃道平行亦如二分黃道之斜過赤道也故低昂異勢

然又有順逆之分而加

減殊焉其白道斜行之勢與黃道相順者則恒減減

惟一法

減者角損而小也雖改其度不變其向

若白道與黃道相逆者

則恒加加者多變遂有異號之用矣

加者角增而大也增之極或滿

象限或象限以上遂至改向

是故限西黃道皆西下而東高限東

黃道皆西高而東下此黃道低昂之勢因黃平象限

而異者也而白道正交

初宮十一宮也即古法之中交

自黃道南而

出于其北亦為西下而東高

黃道半周在地平上者偏于天頂之南以南為

下北為上正交白道自南而北如先在黃道之下而出于其上故比之黃道為西下而東高也

白道

中交

五宮六宮也即古法之中交

自黃道北而出于其南亦為西

高而東下

白道自北而南如先在黃道之上而出于其下故比之黃道為西高而東下也

假

如日食正交而在限西日食中交而在限東是為相順相順者率于交角減五度為定交角是角變而小矣角愈小者東西差愈大故低昂之勢增甚而其向

不易也

限西黃道本西下東高而正交白道又比黃道為西下東高則向西之角度變小而差西

度增大其時刻遲者益遲矣限東黃道本西高東下而中交白道又比黃道為西高東下則向東之角度變小而差東之度增大其時刻早者益早矣是東西之向不易而且增其勢也假如日食正

交而在限東日食中交而在限西是為相逆相逆者率于交角加五度為定交角是角變而大矣角愈大

者東西差愈小故低昂之勢漸平而其或至于異向

也


限東黃道本西高東下而正交白道比黃道為西下東高則向東之角漸大而差東度改小時刻差

早者亦漸平若加滿象限則無時差乃至滿象限以上則向東者改而向西時刻宜早者反差遲矣限西黃道本西下東高而中交白道為西高東下則向西之角漸大而差西度改小時刻差遲者亦漸平若加滿象限則無時差乃至滿象限以上則向西者改而向東而時刻宜遲者反差而早矣

凡東西差為見食甚早晚之根如上所論定交角所生之差與黃道交角無一同者則欲定真時刻非定交角不可也若但論黃道交角時刻不真矣凡東西

差與南北差互相為消長而南北差即食分多少之
根如上所論則欲定食分非定交角不能也但論黃
道交角食分亦誤矣

右日月交食



五禮通考卷一百九十